

بِسْمِ اللَّهِ الرَّحْمَنِ الرَّحِيمِ
نَحْمَدُهُ وَنُصَلِّي عَلَى رَسُولِهِ الْكَرِيمِ

সংক্ষিপ্তসার খুতবা জুমআ

হযরত মুসলেহ্ মাওউদ (রা.)

সংক্রান্ত মহান ভবিষ্যদ্বাণীর পূর্ণতা এবং পাকিস্তান ও ইয়েমেনের আহমদী
ও ফিলিস্তিনের মুসলমানদের জন্য দোয়ার আহ্বান

সৈয়দনা হযরত আমীরুল মুমিনীন হযরত মির্যা মাসরুর আহমদ খলিফাতুল মসীহ্ আল্
খামেস আইয়াদাহুল্লাহ্ তাআলা বেনাস্‌রিহিল আযিয কর্তৃক ২৩ ফেব্রুয়ারী, ২০২৪ ইং তারিখে
যুক্তরাজ্যের (টিলফোর্ড) ইসলামাবাদের মসজিদে মুবারকে প্রদত্ত খুতবা জুমআর সংক্ষিপ্তসার

আশ্‌হাদু আল্লাহ্ ইলাহা ইল্লাল্লাহু ওয়াহ্দাহু লাশারীকালাহু, ওয়াশ্‌হাদু আন্না মুহাম্মাদান আবদুহু
ওয়ারসূলুহু। আন্মাবাদু ফা-আউযুবিল্লাহি মিনাশ শয়তানির রজিম, বিসমিল্লাহির রহমানির রহিম।
আল্‌হামদু লিল্লাহি রব্বিল ‘আলামিন। আর রহমানির রহিম। মালিকি ইয়াওমিদ্দিন। ইয়্যাকা
না’বুদু ওয়া ইয়্যাকা নাস্তাঈ’ন। ইহ্‌দিনাস সিরাত্বাল মুসতাক্বীম। সিরাত্বাল লায়ীনা আনআ’মতা
আ’লাইহিম। গায়রিল মাগদূবি ‘আলায়হিম। ওয়ালাদদল্লীন।

তাশাহ্‌হুদ, তা’উয ও সূরা ফাতিহা পাঠের পর সৈয়দনা হুযুর আনোয়ার (আই.) বলেন :

আজ আমি মুসলেহ্ মাওউদ (রা.) সংক্রান্ত ভবিষ্যদ্বাণীর কিছু দিক নিয়ে আলোচনা করব।
প্রতি বছর এ ভবিষ্যদ্বাণীর পূর্ণতা উপলক্ষ্যে আমাদের জামা’তে জলসার আয়োজন করা হয়, যা
হযরত মসীহ্ মাওউদ (আ.) ১৮৮৬ সালের ২০শে ফেব্রুয়ারি, খোদা তা’লার পক্ষ থেকে জ্ঞাত
হয়ে অসাধারণ বৈশিষ্ট্যবলীর অধিকারী এক পুত্র সন্তান সম্পর্কে করেছিলেন। অনেক শিশুকিশোর
বা যুবক প্রশ্ন করে থাকে যে, জন্মদিন পালন তো নিষিদ্ধ, তাহলে মুসলেহ্ মাওউদ (রা.)’র
জন্মদিন কেন পালন করা হয়? হুযুর (আই.) বলেন, মূলত এ দিনটি মুসলেহ্ মাওউদ (রা.)’র
জন্মদিন নয়, বরং মুসলেহ্ মাওউদ সংক্রান্ত ভবিষ্যদ্বাণীর পূর্ণতা উপলক্ষ্যে এসব জলসার
আয়োজন করা হয়ে থাকে।

হযরত মসীহ্ মাওউদ (আ.) আল্লাহ্ তা’লার পক্ষ থেকে সংবাদপ্রাপ্ত হয়ে মুসলেহ্ মাওউদ
(রা.) সংক্রান্ত যে ভবিষ্যদ্বাণী করেছিলেন, যাতে বলা হয়েছে;

“পরম দয়ালু ও করুণাময়, সুমহান ও সর্বশ্রেষ্ঠ সর্বশক্তিমান খোদা (যিনি মহা মর্যাদাবান
ও গৌরবময় নামের অধিকারী), আমাকে সন্মোদন করে স্বীয় এলহামে বলেছেন, আমার সমীপে
তোমার প্রার্থনা অনুযায়ী তোমাকে আমি দয়ার একটি নিদর্শন দিচ্ছি। আমি তোমার আকুতি-
মিনতি শুনেছি এবং তোমার দোয়াসমূহকে নিজ কৃপাগুণে গ্রহণ করেছি আর তোমার (হুশিয়ারপুর
ও লুধিয়ানার) সফরকে তোমার জন্য কল্যাণময় করেছি। অতএব শক্তি, দয়া এবং নৈকট্যের

নিদর্শন তোমাকে দেয়া হচ্ছে। কৃপা ও অনুগ্রহের নিদর্শন তোমাকে প্রদান করা হচ্ছে। বিজয় ও সাফল্যের চাবি তুমি পেতে যাচ্ছ। হে বিজয়ী! তোমার প্রতি সালাম। খোদা একথা বলেছেন, যেন জীবন প্রত্যাশীরা মৃত্যুর কবল হতে মুক্তি লাভ করে। যারা কবরে চাপা পড়ে আছে তারা বেরিয়ে আসে, যেন ইসলাম ধর্মের শ্রেষ্ঠত্ব এবং আল্লাহর বাণীর মর্যাদা মানবজাতির সামনে প্রকাশিত হয়, সত্য স্বীয় কল্যাণরাজিসহ উপস্থিত হয়, মিথ্যা তার যাবতীয় অকল্যাণ সহ পলায়ন করে এবং মানুষ যেন বুঝতে পারে, আমিই সর্বশক্তিমান, যা চাই তা-ই করে থাকি। আর তারা যেন নিশ্চিতভাবে জেনে নেয়, আমি তোমার সঙ্গে আছি। যারা খোদার অস্তিত্বে অবিশ্বাসী; খোদা, তাঁর ধর্ম এবং তাঁর কিতাব ও পবিত্র রসূল মুহাম্মদ মুস্তফা (সা.)- কে অস্বীকার করে এবং অসত্য বলে মনে করে তারা যেন একটি সুস্পষ্ট নিদর্শন লাভ করে এবং অপরাধীদের পথ চিহ্নিত হয়ে যায়। অতএব, তোমার জন্য সুসংবাদ! এক সুদর্শন এবং পবিত্র পুত্র সন্তান তোমাকে দেয়া হবে। তুমি এক মেধাবী পুত্র লাভ করবে। সেই ছেলে তোমারই ঔরসজাত হবে।”

হযরত মুসলেহ মাওউদ (রা.) সম্পর্কে ভারতের প্রখ্যাত সাহিত্যিক ও সাংবাদিক মওলানা গোলাম রসূল সাহেব লাহোরের শেখ আব্দুল মাজেদ সাহেবকে বলেন, আপনাদের কোনো পুস্তক থেকে এই মহান ব্যক্তির মহান কর্মযজ্ঞ সম্পর্কে পূর্ণাঙ্গীণভাবে জানা যায় না। আমি তাঁকে নিকট থেকে দেখেছি। কয়েকবার সাক্ষাৎও করেছি। মির্যা মাহমুদ সাহেব প্রখর ও তীক্ষ্ণবুদ্ধির অধিকারী ছিলেন, কিন্তু পরিতাপের বিষয় হলো, মুসলমানরা তাঁর কদর করতে পারেনি। চরম বিরোধিতা সত্ত্বেও আমি মির্যা সাহেবকে কখনও ভগ্নহৃদয় দেখিনি। আমরা নিরাশ হয়ে তাঁর সাথে সাক্ষাৎ করতে যেতাম কিন্তু তাঁর কক্ষ থেকে বের হওয়ার পর মনে হতো আমাদের ওপর থেকে নৈরাশ্যের মেঘ সরে গেছে।

লালা ভীম সেন সাহেবের পুত্র কাশ্মীরের সাবেক চীফ জজ লালা কমর সেন সাহেব হযরত খলীফাতুল মসীহ সানী (রা.)'র আরবী ভাষার বক্তৃতা শ্রবণের পর বলেন, আজ আমি আরবী ভাষায় যে চিত্তাকর্ষক বক্তব্য শুনেছি তাতে আমি খুবই আনন্দিত হয়েছি। আমার আনন্দিত হওয়ার আরও কারণ হলো, ব্যক্তিগতভাবেও তাঁর সাথে আমার সম্পর্ক আছে। তাঁর পিতার কাছ থেকে আমার পিতা আরবী শিখেছেন। তিনি বলেন, আমি যখন বক্তৃতা শ্রবণের জন্য যাই তখন ধারণা করেছিলাম প্রবন্ধ হয়ত সেভাবেই উপস্থাপন করা হবে যেভাবে পুরোনো যুগের লোকেরা উপস্থাপন করতো। একবার কোনো আরববাসীর কাছে আরবী ভাষার শ্রেষ্ঠত্ব সম্পর্কে জানতে চাইলে সে বলেছিল, এর প্রথম কারণ হলো, আমি আরবের অধিবাসী। দ্বিতীয়ত, পবিত্র কুরআনের ভাষা আরবী। তৃতীয়ত, জান্নাতেও আরবী ভাষায় কথা বলা হবে। তিনি বলেন, আমি মনে করেছিলাম হয়ত (মির্যা সাহেব) আরবী ভাষার শ্রেষ্ঠত্ব সম্পর্কে এ ধরনেরই কোনো বক্তব্য উপস্থাপন করবেন। কিন্তু তিনি যে বক্তব্য প্রদান করেছেন তা অত্যন্ত জ্ঞানগর্ভ এবং প্রজ্ঞাপূর্ণ ছিল। আমি শ্রদ্ধাভাজন মির্যা সাহেবকে নিশ্চয়তা দিচ্ছি, তাঁর বক্তব্যের একেকটি শব্দ আমি পুরো মনোযোগ এবং গভীর অভিনিবেশের সাথে শ্রবণ করেছি। আমি তাঁর বক্তব্য উপভোগ করেছি এবং এ থেকে লাভবান হয়েছি। আমি বিশ্বাস করি, তাঁর এই বক্তব্যের প্রভাব দীর্ঘ দিন আমার হৃদয়ে বিরাজমান থাকবে। একজন আমেরিকান খ্রিস্টান পাদ্রী বলেন, আজ পর্যন্ত কোনো মুসলমান আলেম আমার প্রশ্নের জবাব দিতে পারে নি। হযরত মুসলেহ মাওউদ (রা.)-এর কাছে তাকে নিয়ে যাওয়া হলে তিনি (রা.) তাঁর প্রশ্নের এরূপ জোরালো এবং প্রভাবসঞ্চারী উত্তর প্রদান করেন যে, সে অভিভূত

হয়ে যায়। এরপর সে মুসলেহ্ মাওউদ (রা.)'র ভূয়সী প্রশংসা করে, এমনকি তাঁর হাতে চুম্বন করে যায়।

২রা ডিসেম্বর, ১৯৩০ তারিখে লাহোর থেকে প্রকাশিত রিয়াসত পত্রিকা লিখেছিল, ধর্মীয় মতভেদের কথা বাদ দিলে জনাব মির্যা বশীর উদ্দীন মাহমুদ আহমদ সাহেব সাহিত্য ও প্রকাশনার জগতে যে কাজ করেছেন তা ভূয়সী প্রশংসার দাবি রাখে।

ইরাকের সমস্যা সমাধানের লক্ষ্যে তিনি ২৫শে মে, ১৯৪১ সনে অল ইন্ডিয়া রেডিও স্টেশনে যুগান্তকারী বক্তব্য প্রদান করেছেন। মওলানা মুহাম্মদ আলী জওহর সাহেব তার পত্রিকা 'হামদর্দ'-এ লিখেছেন, জনাব মির্যা বশীর উদ্দীন মাহমুদ আহমদ এবং তার ব্যবস্থাপনার বিষয়ে কিছু কথা উল্লেখ না করা অকৃতজ্ঞতা জ্ঞাপন হবে, যিনি সর্বপ্রকার ধর্মীয় মতবিরোধের উর্ধ্বে উঠে তাঁর সার্বিক মনোযোগ সকল মুসলমানের কল্যাণের সেবায় উৎসর্গ করেছেন।

হযরত মুসলেহ্ মাওউদ (রা.)'র সূচনাতে অল ইন্ডিয়া কাশ্মীর কমিটির প্রধান নির্বাচিত হওয়া এবং পরবর্তীতে তাঁর নেতৃত্ব থেকে ইস্তফা দেয়ার বিষয়ে খ্যাতিমান, নির্ভিক ও নিঃস্বার্থ নেতা সৈয়দ হাবীব সাহেব 'সিয়াসাত' পত্রিকায় লিখেছেন, যদি বিশ্বাসগত মতবিরোধের কারণে মির্যা সাহেবকে নির্বাচিত করা না হতো তাহলে এই আন্দোলন নিষ্ফল হতো এবং মুসলমান উন্নতের অনেক ক্ষতির সম্মুখীন হতো হতো। আমার মতে, মির্যা সাহেবের পদত্যাগ করা কমিটির জন্য মৃত্যুর নামান্তর।

ড. মুহাম্মদ আল্লামা ইকবাল যার বরাতে জামা'ত বিরোধী অনেক অপপ্রচার করা হয়, কিন্তু রেকর্ডে এটিও রয়েছে যে, ২৪শে মার্চ, ১৯২৭ সালে লাহোরের একটি জলসায় তিনি সভাপতি ছিলেন আর হযরত মুসলেহ্ মাওউদ (রা.) সেখানে বক্তব্য প্রদান করেছিলেন। যা শুনে আল্লামা ইকবাল বলেন, অনেক দিন পর লাহোরে এরূপ বক্তৃতা শুনলাম, বিশেষতঃ পবিত্র কুরআনের বিভিন্ন আয়াত থেকে তিনি যে দলিল উপস্থাপন করেছেন তা ছিল এককথায় অনবদ্য। আমি আমার বক্তৃতার কলেবর দীর্ঘ করতে চাচ্ছি না, কেননা তাঁর বক্তব্য থেকে আমি যে স্বাদ লাভ করেছি তা যেন ফুরিয়ে না যায়।

ভারতবর্ষের স্বাধীনতাকামী নেতা সর্দার শওকত হায়াত খান সাহেব স্বীয় পুস্তকে লিখেছেন, একদিন কায়েদে আযমের পক্ষ থেকে আমার কাছে এ নির্দেশনা আসে যে, তুমি কাদিয়ানে যাও এবং হযরত সাহেবের (অর্থাৎ মুসলেহ্ মাওউদের) কাছে আমার আবেদন পৌঁছে দাও যেন তিনি পাকিস্তানের স্বাধীনতার জন্য তাঁর পুণ্যবান দোয়া এবং সহযোগিতা দ্বারা আমাদেরকে কল্যাণমণ্ডিত করেন।

হযরত মুসলেহ্ মাওউদ (রা.) বিভিন্ন বিষয়ে আহমদী সদস্যদের এবং সর্বোপরি সমস্ত মুসলমানদেরকে দিকনির্দেশনা প্রদান করে বহু পুস্তক-পুস্তিকা লিখেছেন এবং অনেক বক্তৃতা প্রদান করেছেন যার অনেকাংশ ইতোমধ্যে প্রকাশিত হয়েছে আর কিছু বাকী রয়েছে যেগুলো ইনশাআল্লাহ প্রকাশ হয়ে যাবে। কোনো প্রাতিষ্ঠানিক শিক্ষাগত যোগ্যতা না থাকা সত্ত্বেও জ্ঞানের এরূপ বিশাল ভাণ্ডার বিতরণ মূলত তাঁর মেধাবী হওয়া এবং বাহ্যিক ও আধ্যাত্মিক জ্ঞানে পরিপূর্ণ হওয়ারই স্বাক্ষর বহন করে। আমাদের এসব জ্ঞানভাণ্ডার থেকে উপকৃত হওয়ার চেষ্টা

করা উচিত। আল্লাহ তা'লা আমাদেরকে সবাইকে এর তৌফিক দান করুন, আমীন।

হুযূর (আই.) পরিশেষে পাকিস্তানের আহমদীদের জন্য দোয়ার আহ্বান জানিয়ে বলেন, আহমদীদের সতর্ক হওয়ার পাশাপাশি দোয়া এবং সদকার প্রতি পূর্বের চেয়ে বেশি মনোযোগ দেওয়া উচিত। আল্লাহ তা'লা আহমদীদের সুরক্ষা করুন।


ইয়েমেনের আহমদীদের জন্যও দোয়া করুন যেন আল্লাহ তা'লা দ্রুত তাদের মুক্তির ব্যবস্থা করেন। এছাড়া ফিলিস্তিনিদের জন্যও দোয়া করুন। আল্লাহ তা'লা তাদের প্রতিও দয়া করুন এবং পরাশক্তিগুলোর অত্যাচার থেকে তাদেরকে মুক্তি দিন। এছাড়া হুযূর (আই.) ঘানায় আহমদীয়া জামাতের শতবর্ষপূর্তি জলসা সালানার কথা উল্লেখ করে জামাতের সদস্যদের কাছে জলসার সার্বিক সফলতার জন্য দোয়ার আহ্বান জানান।

আল্‌হামদুলিল্লাহি নাহ্‌মাদুহু ওয়া নাসতায়ীনুহু ওয়া নাসতাগ্‌ফিরুহু ওয়া নু'মিনুবিহী ওয়া নাতাওয়াক্কালু আলাইহি ওয়া না'উযুবিল্লাহি মিন শুরুরি আনফুসিনা ওয়া মিন সায়িয়াআতি আ'মালিনা-মাইয়্যাহ্‌দিহিল্লাহু ফালা মুযিল্লালাহু ওয়া মাই ইউয্লিলহু ফালা হাদিয়াল্লাহু-ওয়া নাশহাদু আল্লা ইলাহা ইল্লাল্লাহু ওয়াহ্‌দাহু লা শারীকালাহু ওয়ানাশহাদু আনা মুহাম্মাদান আবদুহু ওয়া রাসূলুহু-

‘ইবাদাল্লাহি রাহিমাকুমুল্লাহু-ইন্লাল্লাহা ইয়া’মুরু বিল ‘আদলি ওয়াল ইহসানি ওয়া ঈ‘তাইযিল কুরবা ওয়া ইয়ানহা ‘আনিল ফাহ্‌শাই ওয়াল মুনকারি ওয়াল বাগ্‌ই-ইয়াইযুকুম লা’আল্লাকুম তাযাক্করন। উযকুরুল্লাহা ইয়াযকুরুকুম ওয়াদ’উহু ইয়াসতাজিবলাকুম ওয়ালা যিকুরুল্লাহি আকবর।

(‘মজলিশ আনসারুল্লাহ ভারত’ কর্তৃক প্রকাশিত সংক্ষিপ্ত উর্দু খুতবার অনুবাদ)

বি. দ্র. - নাযারত নশর ও এশায়াত কাদিয়ান থেকে নব প্রকাশিত বাংলা পুস্তকগুলি হল : ১. ইসলামের অনন্য সাধারণ বৈশিষ্ট্যাবলী ও ২. মেয়ারুল মাযাহেব (ধর্মের মানদণ্ড)। দ্বিতীয় পুস্তকটি প্রথমবার বাংলা ভাষায় অনূদিত হয়েছে। সংগ্রহের জন্য সংশ্লিষ্ট জেলা ইনচার্জদের সাথে যোগাযোগ করুন।- ধন্যবাদ

Bengali Khulasa Khutba Juma Huzoor Anwar^(at)	To, ----- ----- ----- ----- -----	
23 February 2024 Distributed by		
Ahmadiyya Muslim MissionP.O..... Distt.....Pin.....W.B		
বিশদে জানতে : Toll Free No.1800 103 2131 www.alislam.org www.mta.tv www.ahmadiyyamuslimjamaat.in		

Summary of Friday Sermon, 23 February 2024, Bengali 4/4; Translated by Bangla Desk Qadian